

Wáràgà mì JÁKÒMÒ

¹ Nìno a wáràgà 'do mì ye tí Jákòmò, tí bòò mì ndâ Mbírì ta Mbe tí ndoo Jézù tí Bìndi-Mbírì jì yo tí ndâ 'duù mì Mbírì mbe 'vaaka cee muu to 'dáá gî. Ye 'vee yo 'dáá gî ma.

Ndâ vò o

² Ndâ ná'vindí ye, ye kù cu wáràgà tí nó tacó bà 'dè có jì yo máa, ta ndâ o tí nó náa ndâ ña ndâ vò i muu to tí nó 'dáá gî má kù tala yo nó, yo 'ví si ndâ o tí nó tí ndâ líkí'o. ³ Ndâ ña ndâ vò o tí nó a ndâ o tacó bà ñò máa, njembí yo má dú kuu tí Mbírì, tacó yo ñò ni gî máa, bà tala bà ùnje mì yo nó kù jò yú njembí. ⁴ Káa yú njembí delè 'ví si yo 'ví dù tí ndâ cèe 'duù, ta bà lê tí yo wálá, ta 'bí i mbe gboo á 'do mì yo delè wálá. ⁵ Má éno, 'bí 'duù gbaànjé gbí òkò tí yo má ñò i tí nó náa yí 'ví bàkà gbí o vò o nó lá, à nìkì máa, yí yù bà 'di gbí-o 'do mì Mbírì tí mbe kù je i jì ndâ 'duù ká sínò ta có tàkò wálá nò. Bìndi Mbírì bá je bà 'di gbí-o jì yí gî. ⁶ Káa ta o tí nó náa wò má kù 'deke tí lo jì Mbírì nó, wò 'ví si njembí lo 'ví dù ká gbaànjé, wò 'ví me wê-wê lá. Tacó 'duù ñino mbe kù me wê-wê nó ká ⁷ go ngo gbí pù mbe kù gbàngà ta pípìrì, ya éno, ya ézò. ⁸ Ña 'duù tí nó mbe kù me wê-wê á kùro Mbírì go 'duù tí bà njèè kpokèjì, náa yí ñò 'dóó kpokèjì ñino náa yí 'ví co tí lá nó, bà ñò 'dóó ña i tí nó náa yí bà yù 'do

tí Mbírì nó ni wálá. Má é nò, yí 'ví si bà koṛo có gítí bà 'de 'bí ṣa i á 'do mì Mbírì mí to.

Ndâ mbe yê ta ndâ mbe i

⁹ Ndâ ná 'vindí ye, à nìkì máa, mbe yê tí mbe kù ṛu ndi Jézù 'ví dù ta líkí'ò tí wó, tacó Mbírì te yí gí yaà gí. ¹⁰ Wàa 'duù ñìnò ta ndâ i mì wó me gbolò mbe kù ṛu ndi Jézù nó delè 'ví dù ta líkí'ò bà 'vii tí wó ta ndâ mbe yê tí nó mbe kù ṛu ndi Jézù nò, tacó ndâ mbe kpo-kpò i bà mii ta ndâ kpo-kpò i mì ndú nò 'do muu to tí nó ká go bà mii ndâ 'vì mbìlì, ¹¹ náa ju gó ṛi má mo mbìlì gí, ndâ 'vì wó gii 'duku 'dáá gí, bìndi ndâ banga i tí nó kùtàà nó káká'i wálá. À 'vii ká 'vii ta 'duù ñìnó ta ndâ i mì wó me gbolò nò. Yí bà cì ká mí nje nèté ndâ i tí nò.

Ndâ i mbe kù eendi 'duù gítí bà bàkà vò i

¹² À nìkì tí 'duù ñìnó mbe 'dò kò wó mí to tí kpoò gbí ndâ o vò i nó, tacó Mbírì bà ko mboo bà kònò sé'i mì wó nò jì yí ta 'wálá ñìnó mbe cee lá, náa yí tí Mbírì ci ndâ 'duù ñìnó mbe zè yí nìkì ta tó njembí ndú nó gítí nò.

¹³ Má é nò, ta o tí nó náa 'bí i má kù eendi yo gítí bà bàkà vò i nó, yo 'ví 'dè cò máa, «A Mbírì ká tuu i tí nò» nò, jé lá, tacó Mbírì jé eendi 'duù gítí bà bàkà vò i lá. ¹⁴ À kù yòòngò 'duù gítí bà bàkà vò i káa njembí wó, ta bà legee miri wó gí tàkò có mì njembí wó. ¹⁵ Vò njembí kù jò vò i, káa vò i má zèè to gí, yí kù jò ku.

¹⁶ Má é nò, yo si bà eendi tí yo, máa, a Mbírì ká kù yòòngò ndâ vò i gítí yo nò mí to, ndâ ná 'vindí ye. ¹⁷ Tacó à káa ndâ ngbárángà i, ta ndâ i ñìnó

ta bà lê tí ndú wálá nó, ká gí 'do gbíri mì Mbíri tí mbe suu ndâ ɾi, ta pì, ta ndâ yii mbe kù tòngbaà á tàri. ɾi tòngbaà ta bèbìlì lá, delè ndâ pì ta ndâ yii, tòngbaà ta gó ɾi lá. Káa síí gbí o bà tòngbaà mì Mbíri go ndâ i tí nò wàlà; Mbíri ta o 'dáá gí ká ngbèzèè kuu bàndò mì wó. ¹⁸ À káa 'dóó có mì Mbíri gbí muu wó ká si yí 'ví bàkà ndoo tí ndâ 'vii mì wó, tacó wàa ndoo 'ví dù gbí òkò tí ndâ i tí nó nàa yì suu ndú mí muu to tí nó tí ndâ kpédélé i gbí njí nàa à kù ci ji yì tí Mbíri nò.

Cèe kpokèjì bà peteke tàkòcò Mbíri

¹⁹ Yo je mbí yo tí kpoò, ndâ ná'vindí ye, máa, 'duù má kù 'dè cò ji yo, yo 'ví sè tù yo tí kpoò. Yo 'ví bàkà tí yo tí ndâ muu có lá. Yo delè 'ví co gálà gí bà òkòlòwò lá. ²⁰ Tacó mbe kpo-tàkòcò bà ni bà bàkà i nìno mbe nìkì tí Mbíri nó wálá. ²¹ Má éno, yo duu ndâ i zuù tí nó 'dáá nàa yo kù bàkà nó mí tà to. À nìkì máa yo biya ndâ ɲa ndâ vò i 'dáá gí. Yo si tí yo ji Mbíri. Yo sè tù yo gítí có tí nó nàa Mbíri cu mí gbí njembí yo nò, tacó à tí có tí nò a wotí bà njaanga miɾi yo 'do gbí ku.

²² Yo delè 'ví bàkà ndâ i tí nó nàa Mbíri 'dè có ji yo máa yo bàkà ndú nò. Yo sè me káa tù yo cuki lá. Tacó 'duù má sè káa tù wó gítí có, káa yí bàkà ndâ i go có tí nó nàa yí 'di nò lá, 'duù tí nó kù ee a ndi tí wó. ²³ 'Duù má sè káa tù wó gítí có, káa yí bàkà go có tí nó lá, gbí máa, yí go 'duù mbe zeke gbíro wó gbí mándàrà, ²⁴ Káa à káa póó bà te mándàrà 'do 'bì wó mí to, yí ngé gii ò-bà-mbí cè tí gbíro wó gí. ²⁵ Káa 'duù nìno mbe 'di ndâ có mì Mbíri ngbárángà'i, bìndi yí gii kpolo tí ndú mí gbí njembí wó, delè yí gii bàkà

go ndú nó, Mbířì bà cù 'dê ngo cù mítí i tí nó náa yí kù bàkà nò.

²⁶ 'Duù má si tí wó tí mbe řu ndi kòcò Mbířì, káa yí ni bà kpolo tí mè wó lá, gbí có bà řu ndi kòcò Mbířì mì wó nó wálá, yí delè kù ee a ndi tí wó ta kpéétí wó. ²⁷ Bà bàkà nambeè ta búlù tí wálá á ta Bu ndoo tí Mbířì a bà ya gí bà konì ndâ nawù ku, ta ndâ njò, ta o tí nó náa ndú má gbí mbugo, delè ta bà kù'ba 'do tí ndâ vò i muu to tí nô, tacó wàa ndú 'ví ñònòkò muu 'duù lá.

2

Yo te duù mítí ndâ mbe yê

¹ Yo kpónó a ndâ mbe ùnje gítí Jézù tí Bìndi-Mbířì, tí Mbe tí ndoo náa ndoo kù ñò Mbířì mítí wó. Má éno, yo bàkà 'bè mí gbí òkò tí yo, máa, áá mì 'duù ñinó a i, káa ñizó a mbe yê nò, lá, ndâ ná'vindí.

² Yo tala bà kořo muu yo gi. Ndâ 'duù sósò'ò kpónó má yee bàndò bà kili yo gí bà ùlù Mbířì, káa 'bí 'duù gbaànjé gbí òkò tí ndú zaa 'do tí muu wó di tí kò wó, ta ndâ i-banga ta řè ndú a řè ta ndi tí ndâ sili 'bì wó, káa ka wó tí nó náa ndú gí ta yí gbaànjé nó yuu a kárákà zì bòngò, ³ káa yo gii te wiři mítí 'duù tí nó mbe záa-zaa nó mítí banga bàndò, bìndi yo gii 'dè có ta bà tù 'bì yo ji mbe yuu kárákà zì bòngò nó máa, «Ya gí bà pà bàndò wàa wò 'ví dù tí á kàzô.» ⁴ Yo má bàkà go éno, à co to ngé. Ta gbí go éno máa, yo bàkà nò a 'bè mí gbí òkò tí ndâ 'duù ta bà kořo lókó-loko có máa, 'bí 'duù a cèè 'duù, káa ka wó a vò .

⁵ Má éno, yo sè tù yo gítí có tí nô, ndâ ná'vindí. Máa, Mbířì táánò řuka a ndâ 'duù ñinó náa ndâ

'duù muu to tí nó kù si ndú tí ndâ mbe yê nó, máa, ndú 'ví tee njembí ndú mítí yì, wàa ndú 'ví dù tí ndâ cèe 'duù, mbe dù tí ndâ mbe ndâ i tí nó náa yì tí Mbírì cì cì máa, yì bà je jì ndâ 'duù tí nó mbe zè yì nìkì maa nô. ⁶ Káa yo kpónó si ndâ mbe yê tí ndâ i lá. À me ndâ 'duù ñinó ta ndâ kpo-kpò i ká mì ndú nó cóó-cóó ká kù mèèkè'i tí yo lá? A ndâ 'di cóó-cóó ká kù gbùrùngà yo ya tí gí gbí ngbàngà? À me ndâ 'duù ñinó ta ndâ kpo-kpò i ká mì ndú nó lá? ⁷ À me ndú delè ká kù volo ɾè tó 'Duù tí nó tí Bìndi-Mbírì náa yo kaa tí yo gí gbí gèrè mì wó gí nó lá?

⁸ Cèe i bà bàkà mì yo a bà 'di kpóló-kpolo có tí nó náa à cu mí gbí wáràgà mì Mbírì, máa, «Zè 'bí ka lo nìkì á go bà zè tí lo,» nô. ⁹ Káa, à má me ènò lá, wàa yo 'ví dù kù gbètèkè có tí nó ta bà bàkà 'bè mí gbí òkò tí ndâ 'duù, gbí máa, yo kù bàkà a vò i ta bà ndii muu có mì Mbírì. À má ènò, Mbírì bà waa có mítí yo.

¹⁰ Kpètí ká ènò, a tè lá. Tacó 'duù kpètí má kpolo tí sè ndâ 'bí có mì Mbírì 'dáá gí, káa yí 'ví gbètèkè káa 'bí gbaànjé, gbí máa, Mbírì bà waa có mítí wó tacó yí ne nò 'do tí kpokèjì mì Mbírì gí. ¹¹ Ta nderè éno máa, a Mbírì ká 'dè có máa, «Bàkà bangbaya lá.» À delè káa gbèe Mbírì tí nó ká 'dè có máa, «Zi 'duù lá.» Káa, à má ènò, vò i náa 'duù bàkà kpètí má káa bà zì ku, káa yí bàkà bangbaya lá, gbí go éno máa, yí volo nò 'dáá káa có mì gbèe Mbírì tí nó.

¹² Má ènò, yo 'dè banga có jì ndâ 'duù, yo delè 'ví bàkà ndâ tó i jì ndú ta 'dé njembí yo, tacó yo kpónó a ndâ ña ndâ 'duù ñinó náa a Mbírì ká kù

zogo yo ta có ònínó mbe njaanga miṛi ndâ 'duù 'do gbí vò i. ¹³ Tacó ndâ 'duù ònínó mbe ò yê ɾo ndâ 'bí ka ndú kpónó lá nó, Mbíṛi delè bà ò yê ɾo ndú ta ndòngbú o wálá. Káa 'duù mbe kú ò yê ɾo ndâ 'bí ka wó kpónó, Mbíṛi bà ò yê ɾo wó ta ndòngbú o ndii ònínó náa yí bàkà nó gí.

Bà ùnje ta bà bàkà ndâ i go có mì Mbíṛi

¹⁴ Ndâ ná'vindí, 'duù má 'dè káa có ta nje wó cuki máa, yì ùnje gítí Mbíṛi gí, káa yí bàkà go có mì Mbíṛi lá, gbí có bà ùnje mì 'duù tí ò wálá.

¹⁵ Yo tala káa bà koṛo muu yo gi, máa, 'bí ka lo náa yo kú ɾu ndi Jézù ta yí kpónó má ta go tí wó, delè ta bongo tí wó wálá, ¹⁶ káa wò gi 'dè káa có ji yí ta nje lo cuki, máa, «Zèè njembí lo. Mbíṛi bà je ndâ i-zó-zò ta bongo ji wò gí.» Káa wò je me 'bí zì i ji yí wàa yí 'ví 'bu mítí wó lá, wò delè je me 'bí lambu i tacó bà miṛi ngo cù ji yí lá. Gbí có mì lo ò bà dù kuu tí ?

¹⁷ Bà ùnje gítí Mbíṛi delè ká go éno. 'Duù má 'dè ká có ta nje wó cuki máa, yì ùnje gítí Mbíṛi gí, káa yí bàkà ndâ i tí nó náa Mbíṛi 'dè có ji ndâ 'duù máa ndú 'ví bàkà nó, lá, gbí máa, gbí có bà ùnje mì 'duù tí ò wálá.

¹⁸ 'Bí 'duù má 'dè có ji ye, máa, ye a mbe bàkà go có mì Mbíṛi, káa yì a mbe ùnje gítí Mbíṛi, ye bà 'visì có ji 'duù tí ò, máa, 'bí kpokèjì bà túbà tí 'duù tí mbe ùnje gítí Mbíṛi káká'i á bìndi bà bàkà go có mì Mbíṛi wálá. 'Duù ta ùnje gítí Mbíṛi ta ɲa kpokèjì ngayi, náa yí má bàkà go có mì Mbíṛi lá? ¹⁹ Bá ùnje mì lo máa Mbíṛi ká gbaànjé cuki a banga có. Káa ndâ vò lilí delè ùnje ká gítí gbèe

Mbíri tí nò á mì lo nò, ndú delè kù gu ta gúku tí Mbíri.

²⁰ Nò nò, ndi lo ñónókó, ye kpónó kẹ̀jì gí bà túbà ji wò máa, 'duù má 'dè káa có ta nje wó cuki máa yì ùnje gítí Mbíri gí, káa yí bàkà go có mì Mbíri lá, gbí có mì 'duù tí nò wálá. ²¹ Tala bà koṛo muu lo gítí ña nambeè tí nó táánò á gbí òkò tí ndâ gù ndoo Àbiráámò ta Mbíri nó gi. À me 'do gbí có bà ùnje gítí bà waa mbelè 'vii mì wó Ìzákò ji Mbíri lá? ²² Wò kpónó ñò ni gí, máa, ndâ bà ùnje gítí Mbíri, ta bà bàkà go có mì Mbíri, mì Àbiráámò táánò kù bàkà nèté toko gbaànjé. Gbí go éno máa, 'bí i táánò náa Àbiráámò bàkà ká túbà máa, bà lê tí bà ùnje mì wó wálá. ²³ Njìnò a gbí có tí nó náa à gii cu tí mí gbí wáràgà mì Mbíri máa, «Àbiráámò táánò ùnje gítí Mbíri ta njembí wó gbaànjé» nó ká nò. Tacó éno, Mbíri gii ñò Àbiráámò ni tí 'duù mbe ya lè lá. À delè táánò nò a nderè bà dù Àbiráámò tí kómbe Mbíri. ²⁴ Wò kpónó 'di gbí ni gí, máa, a bà bàkà go có mì Mbíri ká kù si 'duù tí tó 'duù kùṛo Mbíri, me káa bà ùnje ta kpéetí wó cuki lá.

²⁵ Yo koṛo muu yo káká'i gítí 'bí niì tí nó táánò ta rẹ̀ wó a Rà'ábù, tí vò mbe nò-vò-ndô nó gi. Ta ndâ bà nò-vò-ndô mì wó nò 'dáá gí, yí delè táánò túbà tí wó tí mbe ùnje gítí Mbíri ká ta bà bàkà tó i. Yí te wiṛi mítí ndâ tú mì ndâ Ìzìriyélì ta bà je i-zó-zò ji ndú, delè ta bà nguù ndú 'do tí ndâ ku'dì tí ndú, bìndi ta o bà njè nó mì ndú 'do 'bá mì wó, yí gii túbà kpokẹ̀jì ñìnó ta vò i tí wálá nó ji ndú.

²⁶ Bà ùnje gítí Mbírì ta bà bàkà go có mì Mbírì á gí tàkò wálá a ku i, go dìi ta woò gbí wálá.

3

Mè

¹ À nìkì máa ndâ 'duù me mbè gbí òkò tí yo 'ví gí tí ndâ mbe nìbà có mì Mbírì jì ndâ 'duù lá, ndâ ná'vindí. Ye 'dè có tí nò jì yo tacó àá bà waa có mítí ze tí ndâ mbe kù nìbà có mì Mbírì jì ndâ 'duù nó tacó bà nìbà co to, ta wotí tí co tí ndâ 'bí 'duù 'dáá gí. ² Ndoò 'dáá káa ndâ mbe gírì'o. Káa 'bí 'duù mbe 'dè có máa nje yì jé yaaka muu to tí nó lá má kuu, yí bà dù a ña 'duù ñìnó mbe ni bà kpolo tí mírì wó gí.

³ Yo ñò káa kècè gi, ndoo kù yuu làmbu lii mì gbí nje kècè tacó bà bàkà yí 'ví 'di có mì ndoo, wàa yí 'ví co tí kpokèjì tí nó náa à gbí muu ndoo nô. ⁴ Delè yo 'ví gíi koṛo káa muu yo gítí gbâ á ro ngo gi. Gbolò pípìrì kpêtí má kù pì yí ya tí gí kè'bì, 'duù bà loko nje wó gítí kpokèjì tí nó náa à gbí muu wó nó ká ta cèe làmbu i bà aa ngo cuki. ⁵ Mè 'duù delè ká éno. Cèe làmbu bà to tí 'duù, káa à tí wó a wotí bà 'dè có gítí ndâ kpo-kpò i.

Yo kpónó koṛo muu yo á gítí bà mii cèe gbolò jìlì mì làmbu wu nje nji kù'ò gi! ⁶ Mè delè a wu. Mè a vò bà to gbí òkò tí ndâ bà to tí ndoo, mbe kù njèè vò i cee gbí dìi ndoo 'dáá gí. Mè kù doo kùùyù ndoo ta wu náa à cu mítí 'do 'bá mì ndâ ku.

⁷ 'Duù bà ko ndâ 'viì-nò náa yí zèè 'do gbí jìlì gí. Yí delè bà ko ndâ nuù, ta ndâ kpoo, ta ndâ i tà ngo gí, ⁸ káa 'duù mbe kpolo tí mè wó wálá. Mè a 'bí ña i mbe kù pèè mbí ndâ 'duù, ta zì wó

go zì kpoo. Yí jé dù ngbìí lá, yí kù njèè zì wó nò ta ndi to.

⁹ Ndoò kù ùlù Mbírì tí Mbe tí ndoo tí Bu ndoo ta mè ndoo. Ndoò delè gù 'visì tí ndoo gí bà ñonoko ndâ 'duù tí nó náa Mbírì suu ndú tí kózò tí wó nó ká ta gbèe mè ndoo tí nò. ¹⁰ Ndâ bà ùlù tí, ta bà ñonoko tí, co 'dáá 'do ká gbí gbèe nje. À lè mi nò gî, ndâ ná'vindí. ¹¹ Ndâ líkí ngo ta míníkà ngo jé 'va 'do gbí gbèe gùù gî? ¹² Mbiìgá jé rì mbâ gî? Mbâ delè jé rì mbiìgá gî? Ndâ ná'vindí. Má éno, líkí ngo jé 'va 'do gbí mànò lá, delè míníkà ngo jé 'va 'do gbí cèe njáá lá.

Cèe bà 'di gbí-o

¹³ 'Bí 'duù mbe 'di gbí-o á gbí òkò tí yo kuu tí? 'Duù tí nò 'di gbí-o gî? Si yí 'ví bàkà ndâ tó i mbe túbà bà ò-gbí-o mì wó. Si yí 'ví bàkà ndâ i tí nò me ta bà tù ngba wó lá. Tacó wàa, ndâ 'duù 'ví ò tí ni éno máa, yí a mbe 'di gbí-o. ¹⁴ Káa ndâ ju kii ta bà koṛo có ká gítí miṛi 'duù má gèè bè ndú mí gbí njembí lo gî, bà gbo i nìkì lá, wò delè kù 'dè a 'vèrè máa wò a mbe 'di gbí-o. ¹⁵ Bà to kii ta bà dù ta bà koṛo có ká gítí miṛi 'duù me ndâ i mì mbe 'di ña gbí-o tí nó mbe gí 'do mì Mbírì nó lá. Ndú gí a i 'do tí ndâ vò bà koṛo có mì ndâ 'duù muu to tí nó, ta ndâ vo-vò i mbe kù volo muu ndâ 'duù. ¹⁶ Bándò tí nó náa ndâ ju kii ta bà koṛo có ká gítí miṛi 'duù kù dù tí nò, a bándò ñìnó náa ndâ vò i ta ndâ ña ñónókó-ñònòkò tí 'dáá gí kù dù tí.

¹⁷ Káa cèe bà 'di gbí-o mbe gí 'do mì Mbírì tende. Ña bà 'di gbí-o tí nò bà dù tí i ta bà lê tí wálá, delè bà dù tí i mbe 'dèe njembí ndâ 'duù.

'Duù mbe 'di ña bà 'di gbí-o tí nò bà zèè ndâ 'duù ta pétékè 'bì wó, yí delè bà dù tí mbe 'di có mì ndâ 'duù. Mbe 'di ña bà 'di gbí-o tí nò bà ñò yé ɾo ndâ 'duù, yí delè bà bàkà tó i ká tà ndi ka wó tó i. Njembí 'duù mbe 'di ña bà 'di gbí-o tí nò me duù. Yí delè me mbe nambee-ɾo lá. ¹⁸ Ndâ mbe peteke njembí ndâ 'duù kù bàkà gbí pétékè có. Ndú go ndâ 'duù mbe ɾo ndâ banga i mí gbí njí mì ndú. Nèté mì ndú a bà bàkà ndâ banga i túkà'i.

4

Gbínje gbí òkò tí ndâ mbe kù kili ta ɾè mì Bìndi-Mbírì

¹ A yè ká kù si yo kù 'dèèkè mà? A yè ká kù si yo kù gò gó ta o 'dáá gî? Ndâ i tí nó ta go ndú tí yo nó kù gò gó gbí njembí yo ta o 'dáá gî; ñìnò a i tí nò mbe kù si yo kù gò gó gbí òkò tí yo nò. ² Yo kù tò kii muu 'bí i, káa bà 'de i tí nò kpò yo gî, má éno; yo kù 'dèèkè mà, yo delè kù gò gó. Yo kù dù ta go ndâ i gbí njembí yo, káa kpokèjì bà 'de ndâ i tí nò mì yo wálá; má éno, yo kù ziki ndâ 'duù bìndi ndâ i tí nò. Yo 'de ndâ i tí nò ta go ndú tí yo gbí njembí yo nò lá, tacó náa yo yù ndú 'do me mì Mbírì lá. ³ Káa yo ta ndâ 'bí o kpétí má yù ndú, Mbírì je ndú jì yo lá, tacó yo yù ndú me ta cèè nderè lá, yo kù yù ndú ká tacó bà bàkà líkí'o mítí yo cuki.

⁴ Njembí yo dù tí gbèe i lá, go njembí ndâ ni mbe ɾàngà kù. 'Duù má zèè ndâ i muu to tí nó ta 'bì wó sósò'ô, yí 'ví kù a 'bí ngú 'bì tacó bà zèè ta Mbírì? 'Duù má tee njembí wó 'dáá ká mítí ndâ i á muu to tí nó, yí bà gí tí ku'dì tí Mbírì. ⁵ Yo

koṛo có máa, có tí nó náa à cu mí gbí wáràgà mí Mbírì, máa, «Mbírì suu lilí ji ndoo tacó wàa ndoo 'ví dù tí ndâ 'dóó i mì yì» nó a 'véṛè? Má éno, yí kù tò kiì muu ndoo ta o tí nó náa ndoo má kù tee njembí ndoo mítí ndâ 'bí tende i si yí mí to nô. ⁶ Tacó éno, Mbírì kù bàkà nambeè ji ndoo me gbolò, tacó wàa ndoo 'ví dù ta o 'dáá gí tí ndâ i mì yì. Á go có tí nó náa à cu mí gbí wáràgà mì wó tí Mbírì, máa, «Mbírì kù bàkà nambeè me gbolò ji ndâ mbe si tí ndú kùṛo wó tí Mbírì tí i lá, káa yí biya có mì ndâ mbe si tí ndú tí i ta wotí tí » nô.

⁷ Má éno, ye kù 'dè có ji yo, máa, yo si tí yo ji Mbírì, wàa yo 'ví 'dò kò yo mí to tí kpoò gítí gó ta Gba-vò-i, bindi Gba-vò-i bà ì ngèlè 'do tí yo gí. ⁸ Yo yèè ndi yo dè gí mì Mbírì, wàa Mbírì bà yèè ndi wó dè gí mì yo. Yo si bà bàkà i zuù mí to, ndi yo ndâ mbe gilìni, wàa yo tí ndâ mbe gbo gbù sè mí nje ngá só 'ví si njembí yo 'ví dù ngbárángà'i. ⁹ Yo wa tí yo tacó ndâ vò i mì yo. Yo dù ta yê ɾo yo tí yo, yo ɾo 'dì lá, yo dù zùkùù, yo dù ta líkí'o tí yo lá. ¹⁰ Yo si tí yo tí i kùṛo Mbírì lá, wàa a yí ká 'ví bàkà yo tí ndâ 'duù.

¹¹ Yo 'dè vò có gbí òkò tí yo lá, ndâ ná'vindí. 'Bí 'duù má 'dè vò có gítí ná'vindí wó, yí má ɾonoko yí, gbí go éno máa, 'duù tí nò kù 'dè nò a vò có gítí ndâ có mì Mbírì, yí kù ɾonoko nò a ndâ có mì Mbírì. Káa 'duù má nì ɾónókó gítí ndâ có mì Mbírì gí, yí kpoò nò me mbe sè tù wó gítí ndâ có tí nò káká'i lá. Gbí máa, yí kù si tí wó tí 'duù ta wotí mì wó ndii muu ndâ có tí nò gí. ¹² Káa wotí bà 'dè có ji ndâ 'duù ká tí Mbírì cuki. Wotí

bà waa có mítí ndâ 'duù delè ká mì wó tí Mbírì ta kpéétí wó. Wotí bà 'vala ndâ 'duù, ta wotí bà zi ndâ 'duù delè ká mì wó. Káa wò a 'di, wàa wò 'ví waa ta có á mítí 'bí ká lo 'duù á go wò?

Ndâ mbe ci o

¹³ Yo sè tù yo, ndí yo ndâ 'duù tí nó mbe ò-bà-mbí Mbírì gí, bindi yo gii ci o, máa, «Ze má ya wúnó lá, ze bà ya taàbé gí bà mà 'velè á gbí gbata tí zò. Ze má too ndoò gbaànjé mí kà, ze bà 'de i me gbolò.» ¹⁴ Káa yo ta kpéétí yo ò i ònínó á kèjì gí bà bàkà tí taàbé dè nó lá. Bà 'vala yo tà go yè? Bà 'vala yo ká go ngomè náa pípìri má pì kpónó gbí làmbu o, ngomè aanga gí. ¹⁵ À nìkì mì yo kùtáá a bà 'dè có go éno máa, «Mbírì má konì ze yee tí o tí nó gbí muu ze nó, ze bà bàkà go éno, go éno.» ¹⁶ Káa yo kpónó kù bàkà tí yo tí ndâ 'duù gé ndii gí. Yo delè kù gbo i gítí ndâ i ònínó náa yo kèjì gí bà bàkà ndú nó. Káa ña bà gbo i éno nìkì lá.

¹⁷ 'Duù má ò yúcó ni gí, káa yí bàkà lá, gbí máa, yí kù bàkà a vò i.

5

Ndâ mbe kpo-kpò i bà gii kònò sé'i

¹ Yo sè tù yo, wàa yo 'ví 'di ta có tí nó, ndâ mbe kpo-kpò i. Yo wa tí yo, yo 'ví tò ndòzì, tacó yo kèjì gí bà kònò sé'i ta wotí tí. ² Ndâ kpo-kpò i mì yo nò bà gii zii 'dáá gí, ndâ ki bà gii da ndâ bòngò mì yo nò 'dáá gí. ³ Ndâ gùrúsù mì yo nò bà gii gbì ngbàza. Ngbàza tí nò bà túbà máa, yo bàkà tó i ta gùrúsù mì yo lá. Ngbàza tí nò delè bà túbà máa, 'bí i bà gii zò dìi yo á go bà zò ndâ

liì mì ngbàza. Ndâ i tí nò náa yo zèè ndú kácá-kácá nò bà gii dù tí tàcu wu tacó bà gii doo ta yo ta ndòngbú o.

⁴ Yo òò òa ndâ i tí nò náa yo kù bàkà nò gi. Yo ko mboo nèté mì ndâ mbe bàkà nèté gbí ndâ njí mì yo ji ndú lá. Yo sè tù yo, wàa yo 'ví 'di káa kòcò ndâ i tí nó náa yo biimo ndâ mbe bàkà nèté tacó tí ndú 'do tí ndú gí nó kù 'dè kòlòwò gítí yo gi. Kòcò gbí mì ndâ 'duù tí nò mbe bàkà nèté gbí ndâ njí mì yo káa yo sè tàkò nèté mì ndú lá nó yee gbí tù Mbírì tí Mbe tí ndâ i 'dáá gí gí.

⁵ Yo kù 'vala á muu to tí nó gbí dà. Yo zò òò, wàa yo 'ví yuku ta tí yo, káa yo òò ni lá máa, yo kù 'vii nò a ndi tí yo tacó bà waaka yo mì Mbírì go bà waa bee ta o bà waa có. ⁶ Yo ká kù waaka có ta 'vérè mítí ndâ 'duù ònó ta vò i mì ndú wálá nó gbí ngbàngà; ndâ 'duù ònó ta 'bí i mì ndú náa ndú 'ví me ta yo tacó bà 'vala mìrì ndú 'do mì yo wálá nó kù mì 'do gbí có mì yo.

Yo te duù mítí njembí yo

⁷ Má éno, yo kpónó 'ví zèè njembí yo di tí o bà gí Mbe tí ndoo, ndâ ná'vindí ye. Yo òò káa òa bà zèè njembí ndâ mbe ji njí gi. Ndú zèè njembí ndú 'do tí o bà yee nji òa mí tà to di tí o bà kili ndâ tó i 'do gbí njí. ⁸ Má éno, yo zèè njembí yo, wàa yo 'ví 'dò kò yo mí to tí kpoò, tacó o bà gí Mbe tí ndoo kpónó me jé'dée gí.

⁹ Yo si bà 'dè ví có gbí òkò tí yo mí to, ndâ ná'vindí. Yo má bàkà go éno, àá bà waa có mítí yo ta ndòngbú o. Yo zeke'o gi, kùro o bà gí mbe waa có kpónó dooko gí. Yí kpónó-kpónó bà yee tí yo.

10 Yo 'ví koro muu yo delè gítí ña kpácà mì ndâ mbe 'dòkò có mì Mbírì gbí ndâ vò o gbí o mì ndâ ká gù ndoo dígísèé, waa yo 'ví mèlè ndi ndú.

11 Yo ñò ña nambeè tí nó táánò náa Mbírì bàkà ji ndú tacó ndú táánò a ndâ mbe kpácà gbí ndâ vò o tí ñò ñò gi. Yo 'di tàwo ña nambeè tí nó náa Mbírì táánò bàkà ji Jóbè á bìndi bà nanaka muu wó mítí bà ùnje gítí Mbírì si yí táánò ta sé'i tí wó nó gî. Yo delè gii ñò ni gî, máa, Mbírì táánò gii si có ndâ i mì Jóbè mbe volo nó ta bà me mbè. Mbírì bàkà ña gbolò nambeè tí ñò ji Jóbè tacó yí kù zè ndoo ta pétékè njembí wó, yí delè kù ñò yê ro ndoo.

12 'Bí kpóló-kpolo có gbaànjé náa ye bà 'dè ji yo a ñinô, ndâ ná'vindí, máa, yo si bà see tí yo mí to. Yo see tí yo máa, «Go gbírì,» lá, yo delè 'ví see tí yo máa, «Go to tí nó,» delè ta rẹ̀ mì 'bí ña i là. Káa wò tí 'duù má ùnje gítí i gî, 'dè káa có máa, «Ye ùnje gî.» Káa wò má biya i gî, wò delè 'ví 'dè káa có máa, «Ye biya gî.» Káa wò má me me éno lá, wò bà yuu miři lo mí gbí vò i ta ndòngbú o.

Bà 'deke tí ji Mbírì

13 'Bí i má kù pèè mbí 'bí 'duù gbí òkò tí yo, si yí 'ví 'deke tí wó ji Mbírì. Káa delè 'bí 'duù gbí òkò tí yo má ta líkí'o tí wó, si yí 'ví be rẹ̀ Mbírì gbí cè. 14 'Bí 'duù gbí òkò tí yo má ta ñò'o tí wó, si yí 'ví tè'é tí ndâ 'bí tó kpo 'duù gbí òkò tí yo tí ndâ mbe kù kili ta rẹ̀ mì Bìndi-Mbírì, waa ndú 'ví 'deke tí ndú ji Mbírì tacó tí wó. Káa ta o tí nó náa ndú má kù 'deke tí ndú ji Mbírì nó, ndú 'ví tořò bàà mítí wó ta rẹ̀ mì Mbe tí ndoo Jézù tí

Bìndi-Mbíṛì. ¹⁵ Ndú má 'deke tí ndú ji Mbíṛì ta njembí ndú dú, Mbíṛì bà je à-cee-gî gítí ndâ vò i mì mbe nò'o tí nò gî, yí delè bà si yí 'ví a gí yaà 'do gbí nò'o mì wó nò gî. ¹⁶ Má énnò, yo yù gbí ndâ vò i mì yo á gbí òkò tí yo. Yo delè 'ví 'deke tí yo ji Mbíṛì tacó tí yo gbí òkò tí yo, wàa yí 'ví 'vala ta yo 'do tí ndâ i ñínó mbe kù pèè mbí yo nò. Ye 'dè có tí nò ji yo, tacó tó 'duù má 'deke tí wó ji Mbíṛì, à gbí kòcò wó a wotí tacó bà gí ta ndâ kpo-kpò i 'do mì Mbíṛì.

¹⁷ Yo koṛo muu yo gítí Èlìjà tí mbe 'dòkò có mì Mbíṛì táánò gbí o mì ndâ ká gù ndoo gi. Yí táánò káa 'duù ta ndâ sili 'bì wó vô ká go ñìndi ndoo. Káa ta 'bí o gbaànjé Èlìjà gi 'deke tí wó ji Mbíṛì ta njembí wó gbaànjé, máa, mù 'ví si bà nì mí to. À dú káa yúcó, 'do tí o tí nò, mù gi nì gbí to tí nò lá ta ndoò ta'ò ta pì vô-nje gbaànjé pí. ¹⁸ Káa bà o tí nò mâ gi ndii gî, Èlìjà gi 'deke ndi tí wó ji Mbíṛì káká'i máa, yí si mù 'ví nì. Mù dú gi nì go có mì wó nò gî. Bìndi ndâ dó kú i gi 'bìtà bà kù ndi ndú káká'i.

¹⁹ Ndâ ná'vìndí, yo konì ndâ 'duù ñínó mbe giṛì'o 'do tí kpokèjì mì Mbíṛì gî nò. Yo gí ta ndú gítí tó kpokèjì káká'i. ²⁰ Yo nò ni gî máa, 'duù má 'visì muu 'bí mbe giṛì'o 'do tí kpokèjì mì Mbíṛì gí gítí tó kpokèjì, gbí máa, 'duù tí nò 'vala nò a ka wó 'do gbí bà waa có mítí wó bìndi ku mì wó gí. Mbíṛì delè bà je à-cee-gî gítí ndâ 'bí ká vò i tí nò 'dáá gí náa 'duù tí nò mbe dele gítí tó kpokèjì nò bàkà ndú si yí táánò tí vò kpokèjì nó gí.

**Ngú bà toko nambeè mì Mbírì ta ndâ 'duù
Ndogo: Ngú bà toko nambeè mì Mbírì ta ndâ 'duù
New Testament**

copyright © 2001 Wycliffe Bible Translators, Inc.

Language: (Ndogo)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

14424ae9-b5af-591e-814e-49316d8d74aa